

# TIMOR-LESTE NO NIA FRONTEIRAS MARÍTIMAS

Timor-Leste buka atu delimita fronteiras marítimas permanente tuir lei internacional, inklui Nasoens Unidas nia Konvensaun ba Lei Tasi [UNCLOS] 1982 nian.

Agora dadaun, Timor-Leste seidak iha fronteiras marítimas permanente ho nia viziñu rua: Indonézia no Austrália.

Fronteiras marítimas mak kestaun soberania ba povu Timor-Leste.



Mapa ne'e hatudu fronteira marítima ida sei sai hanesan ne'e se ita uza dalan ekidistância / sirkumstância relevante tuir lei internacional.



## PROGRESU HO INDONÉZIA

- Iha 2015, Timor-Leste hahú koalia ho Indonézia ba fronteiras marítimas. Indonézia no Timor-Leste kompromete atu negosia fronteira marítima permanente ida tuir lei internacional.
- Timor-Leste respeita konfidensialidade ba prosesu negosiasaun ida ne'ebé lao hela ne'e.



## HASEES-AAN NO REKUZA SIRA HUSI AUSTRÁLIA

- Timor-Leste la iha dalan direitu atu delimita fronteira marítima ida ho Austrália tanba:
  - Iha Marsu 2002, fulan rua molok Timor-Leste restaura nia independênsia, Austrália hasees-aan tiha husi prosesu ba rezolusaun obrigatória ba disputa ne'ebé relaciona ho fronteiras marítimas tuir UNCLOS, ida ne'ebé esklui possibilidade ba tribunal ida atu halo desizaun kona ba fronteiras marítimas, no
  - Austrália mos lakohi atu negosia fronteiras marítimas permanente bilateralmente.

## ARANJUS TEMPORÁRIU SIRA HO AUSTRÁLIA

- Austrália no Timor-Leste halo tiha ona tratadu provizional tolu hodi fahé reseita sira ba petróleu no gaz iha Tasi Timor. Tratadu sira ne'e la estabelese fronteiras marítimas no esplika ho klean katak sei la tau risku ba nasaun rua ne'e nia direitu kona ba delimitasaun final ba sira nia fronteiras marítimas.
- Tratadu sira ne'e fó liu saida mak Austrália nia direitu tuir lei internacional.
- **2002 Tatadu Tasi Timor** asina iha loron dahuluk ba Timor-Leste nia restaurasaun ba independênsia, 20 Maiu 2002, no kontinua husi **1989 Tratadu Timor Gap** ne'ebé Austrália negosia ho Indonézia durante okupasaun.

- Timor-Leste agora dadauk dezafia hela **2006 Tratadu CMATS** nia validade iha Tribunal Arbitrajen Permanente iha Haia hafoin hetan fali evidênsia ba alegasaun Austrália nia espionajen durante negosiasaun ne'ebé lori ba tratadu 2006.

## LEI INTERNASIONAL MAK 'DALAN EKIDISTÂNSIA / SIRKUMSTÂNSIA RELEVANTE'

- UNCLOS ezizi delimitasaun fronteira marítima ida, atu atinji "solusaun ekiativa ida" no Estadu sira la bele "tau risku ka taka dalan hodi hetan akordu ba [fronteira marítima] final."
- Ba Estadu sira ho reivindikasaun ne'ebé tatulak malu (hanesan Timor-Leste ho nia viziñu rua), tribunal internacional, liu-liu Tribunal Internacional ba Justisa, klarifika tiha ona no agora estabelese ona 'dalan ekidistância / sirkumstância relevante' ba delimitasaun ba fronteira marítima tuir UNCLOS no lei internacional ba *konsuetudináriu* (haree, ezemplu, Kazu Mar Negru (2009)).
- Dalan ne'e baibain hahú ho dada liña ekidistância provizóriu ida entre nasaun rua. Dalan daruak mak ajusta liña ne'e hodi haree ba 'sirkumstância relevante sira', hanesan illa sira, afeta husi tasi-ibun ne'ebé konkave ka konvexu no tasi-ibun nia naruk ne'ebé la hanesan. Hakat ikus liu mak aplika teste *não-desproporcionalidade* (haree fila fali se ajustamentu provizória ba liña ekidistância ne'e hanesan ba Estadu rua ne'e ka, lae).
- Dada liña ekidistância provizória mak hanesan hakat dahuluk iha prosesu ba pasu-tolu.
- Tuir lei internacional, 'dalan ekidistância / sirkumstância relevante' sei aplika ba Timor-Leste nia fronteiras marítimas tomak.